

Matauriro akakodzera

PANOPERA CHIDZIDZO UNOTARISIRWA KUNGE WAVA KUGONA

- Kutaura zvine hunhu, zvichienderana nenzvimbo yaanenge ari.

MuchiShona mune matauriro akasiyanasiyana zvichienderana nokuti pari kukurukurwa nezvei, ukama hwevari kukurukurirana uye zvii zviri kukurukurwa pamwe nenzvimbo yacho.

Tsika namagariro eChishona anosungawo kukodzera kwemutauro unenge uchishandiswa. Somuenzaniso:mubereki nomwana wake vanotaura sei?

vanhu vasangana vasingazivani vanotaura sei?

munhu ari mumusangano wekubasa anotaura sei?

munhu ari kutsvaga basa pangava panhare kana kuti vakatarisana anotaura sei?

mwana wechikoro anotaura sei nevadzidzisi vake nomukuru wechikoro?

vasekedzani seshamwari neshamwari kana ambuya nemuzukuri vanotaura sei?

Zvakawandisa zvinocherechedzwa sekuzvitsanangura kwakaitwa pasi apa

Parufu

Parufu pane mitauro inobuda yakanangana nekuchema, kudunura nokudemba kunenge kuchiita nyakufirwa.

Umwe mutauro weparufu unobuda apo vanhu vanenge vachiedza kunyaradza afirwa.Nyakufirwa anogona kudunura achiti:

“Baba matisiya toga munoti tinochengetwa naaniko?

Nhai amai, matora mumwe wenyu mati toita seiko vana venyu?”

Vanonyaradza vanogona kuedza kunyaradza vachiti

“Chirega kuzviuraya nokuchema baba vafambe zvakanaka, musoro ungaswere wobanda. Ukaramba wochema mweya wavo unozoramba wongodzungaira.

Chirega kuramwa sadza baba vako vasununguke.

Vangatonyanya kudzungaira vakatadza kufamba zvakanaka.”

Apa zvaingoitirwa kuti nyakufirwa adye.

Parufu pane mutauro unoitwa weChisahwira unoitwa nasahwira wepamusha pafiwa achiedza kusetsa nekunyevenutsa moyo yevafirwa.

Anogona zvakare kupindiridza achirova bembera kumhuri yepo achitsiudza kana pane ari kufungirwa kuti ndiye ari kuuraya vamwe mumhurimo

Uyu mutauro wekutuka vachibhendesera somuenzaniso:

“Gore rino muchapedzana nokuda upfumi!”

Apa panenge pachifungidzirwa kuti pane akaromba zvava kukonzera kupera kwerudzi.

Afirwawo anogona kuitawo bembera ipapo achichema sokuti:

“Maiwe-e, vana vangu vofira kuti ndakaramba nhaka here vanhu vepano?”

Kune mabafirwa anoitwa maoko akasiyana. Mazwi okubata maoko:

-Nematambudziko.

Afirwa anopindura achiti:

-Aonekwa.

Mamwe mazwi okubata maoko:

Nedzinoparadza.

Nenhamo dzatiwira.

Nedzoi.

Afirwa anopindura achiti:

Dzaonekwa.

Nhaurirano yebasa

Kune nhaurirano yebasa inogona kuitika pakati pevanhu vangava vakatarisana kana vari kutaurirana panhare.

Apa hapashandisiwi mutauro wechishamwari kana chisekedzani pahurukuro yebasa.

Apa panenge pachitaurwa nyaya dzakakosha dzekutsvaga basa kana zviri kuitika pabasa.

Mutauro uyu wakangofanana newekutsvaga nzvimbo yechikoro kana wemumusangano webasa.

Hurukuro yebasa haina chisekedzani nekubvunzana vasara kumba.

Izere kuremekedzana uye haina mazwi echizvinozvino sekuti:

“Zviri sei sei?”

Mazwi haadimbudzirwi sekuti,

“Ndini Rue,” unototi “Ndini Ruvimbo Hove.”

Izvi zvinocherechedzwa nguva dzose kana nepanhare ndizvozvo kana iri hurukuro yebasa.

Hechino chidimbu chehurukuro yebasa

Muzvinabasa: Unonzi ani zita rako?

Ropafadzo: Ndinonzi Ropafadzo Hondo.

Muzvinabasa: Ndaona tsamba yenyu, muri kuda kuita munyori wedu pakambani ino?

Ropafadzo: Hongu!

Muzvinabasa: Chii chingaita kuti kambani itore imi pane vanhu vose vakatinyorera vachitsvaga basa?

Ropafadzo: Ndiri munhu akarongeka, anoda kuti zvinhu zvigare zvichifamba negwara rakanaka. Njere dzungu dzakarodza, mukatarisa kudzidza kwandakaita, kunoratidza kuti ndiri munhu wekuti mukandipa mukana wekushanda pano, ndinokwanisa kuti ini nemi tibudirire pamabasa ose atinoita.

Muzvinabasa: Tichazokuudza mhinduro yekuti wawana basa here mangwana.

Ropafadzo: Ndinotenda VaHove.

Kutaura navanhu vakuru

Kutaura nevanhu vakuru kunoda mutauro uzere kuremekedza nechinyarikani.

Unogona kubuda pakati pemwana nevabereki vake, tezvara nemukuwasha, mudiki nemukuru.

Mutauro uyu unogona kubuda pakati pemwana mudiki nemunhu mukuru wemunharaunda kana mupfuuri zvake.

Kana zvidao zvichizivikanwa munhu mukuru anomhoreswa nechidao chake.

Chisekedzani kana musara nemutorwa hazvukurudzirwi.

Kana kuri kutaura neweukama unogona kudoma zita rake zvinokudzikana sekuti:

“Maswera sei tete?”

Kana kuti,

“Makadii Muguriri?”

Kugona kutaura nomunhu mukuru kunopima kugona kwemunhu tsika dzeChiShona.

Ndiko kunopima kurairwa kwemwana zvakare saka zvakakosha kuziva muganhu wepekusekedzana nemunhu mukuru uye mazwi okuburitsa mukana.

Kunyunyuta

Uyu mutauro unoitwa nemunhu anenge agumbuka kana ari kupopota pamusoro pezvaanenge achinyunyutira.

Vanogona kunge vari vakadzi vari pabarika vachiburitsirana chigumbu.

Anogona kunge ari mukadzi kumurume wake kana vamwene nemuroora.

Anogona kubuda ari mazwi ari kutaurwa, dzimwe nguva karumbo kanenge katorukirwa kuburitsa nyunyuto yacho.

Muenzaniso:

Muroora aigona kuimba nezvavamwene vanomushusha achiti:

“Vamwene vangu vanoshusha nhai asikana imi!

Ndiswere zvangu ndakachena, hanzi ihwezvavarume!

Ndiswere zvangu ndakasviba, hanzi nguruve yomukadzi!

Nditume mwana nepasuro, wandigovera sepwere!”

Pamwe pachokwemukadzi anogona kuimbira murume sezvinotevera:

“Ndaiziva kuti uri rombe iwe! Ndingadai ndakafira pamba pababa vangu...!”

Kupfimbana

Uyu mutauro unonyanyoshandiswa nemajaya nemahandara mukupfimbana.

Rinogona kunge riri jaya riri kunyenga kana rakatodiwa.

Musikana anogonawo kuruka dzvetero rake kujaya raanoda kuri simbisa rudo.

Vakarooranwo zvikuru vechidiki vanogona kupota vachiyemedzana nenzira iyi.

Mazuva ano kana harahwa nechembere dzava kudeketererana mazwi ane uchi.

Mutauro uyu uzere nendyaringo kana kuti utsenza hwekugona kukwezva nekunyungudutsa mwoyo wemutereri.

Mazwi mazhinji azere kutsvetera nokufonyora pfungwa zvikuru dzemusikana zvekuti hapana kure kwaaifanirwa kuenda asati ada mukomana atapirirwa nekutsveterwa.